

# Per proteger minoritads religiusas en Irac e Siria

DA GUIU SOBIELA-CAANITZ

## ■ Mintga primavaira en Germania sa rimnan umans inspirads dal messadi cristian per discutir problems dal temp: Ils onns pèrs sut l'egida da catolics, ils spèrs sut quella da protestants.

Il motto dal «Kirchentag» 2019 a Dortmund en il Rain dal Nord-Vestfalia (NRW) tunava: «Was für ein Vertrauen». Ins na s'ha betg mo engaschè per cristians u per Tudestgs. La «Gesellschaft für bedrohte Völker» (Gfbv, Göttingen en la Saxonia Bassa), cun l'istoricher Kamal Sido (1), ha approvà in text «per proteger minoritads religiusas en l'Orient Proxim» sin proposta da l'uestg coptic Anba Damian (claustra da Brenkhausen a Höxter en il NRW) e dal Curd alevi Ali Ertan Toprak, parsura da l'Uniun federala da l'immigraziun en Germania. La resoluziun di:

### La Germania duess gidar lezzas cuminanzeas

«Sunter blers onns da guerra en Irac e Siria, nua ch'ins ha duvrà er armas tudestgas, pon ins (...) sperar cha la violenza fineschia (...). Ma la discriminaziun e las persecuziuns tranter religiuns èn anc adina parts dal mintgadi. Ils cumbats duran. Blers vitgs èn en muschna. Cristians, Jesids ed autras minoritads da l'Orient Proxim, tgina da lur crettas, basegnan urgentamain pasch, reconstrucziun e dialog tranter religiuns per porscher puspè in dachasa segir nua ch'i possian restar u turnar. In tal engaschi gress a favur da l'entira populaziun turmentada en l'Orient Proxim. Mintga religiun là ed en Germania sto rinforzar ina tala politica. Perquai postulain nus:

1. A las unfrendas da persecuziuns ston ins porscher vinavant en Germania in dachasa segir fundà sin la diversitad religiusa. La politica e las baselgias ston resguardar differentas gruppas culturalas e religiusas, sco la Federaziun centrala da las uniuns assiricas en Germania [Gütersloh/NRW info@zavd.de], il Cussegl central dals Jesids en Germania (2), (...) l'ovra cristiana d'agid Capni, la baselgia coptica en Germania e l'Uniun federala da l'immigraziun en Germania.

2. La Germania duai metter las relaziuns tranter gruppas religiusas e la protecziun da las minoritads en il center da ses agid al svilup ed da sia politica exteriura en Irac e Siria, e quai areguard ils temas e las finanzas.

3. Las venditas tudestgas d'armaments a la Tirchia han contribuì a stgatschar e persecutar cristians, Jesids, Arameics, alevids, Curds ed autras minoritads ed a periclitlar cunzunt femnas ed uffants (...). La Germania duess smetter da furnir armas a la Tirchia uschè ditg che lezza occupa la regiun siriana d'Afrin [sper il cunfin tirc].»

### L'immigraziun assirica en Svizra

Cristians arameics (assirics) datti er en Svizra, numnadamain en la claustra Mor Avgin (sontg Eugen) da la baselgia sirica ortodoxa ad Arth/SZ sper il Lai da Zug, cun cults divins en lingua arameica. En Svizra vivan var 10000 cristians aderents da lezza baselgia; ils blers derivan da la Republica circa (district da Mardin (3) al cunfin da la Siria), insaquant da l'Irac u da la Siria.

1. Geiststr. 7, D-37073 Göttingen <K.Sido@gfbv.de>

2. Unter den Eichen 62, D-40625 Düsseldorf/  
NRW info@zentralrat-eziden.com

3. Per arameic «Mèrdô».